

<https://www.thelatinlibrary.com/plautus/captivi.shtml>

ego ibo ad fratrem ad alios captivos meos,
visam ne nocte hac quippiam turbaverint.
inde me continuo recipiam rursum domum.

ERG. Aegre est mi, hunc facere quaestum carcerarium
propter sui gnati miseriam miserum senem. 130

sed si ullo pacto ille huc conciliari potest,
vel carnificinam hunc facere possum perpeti.

HEG. Quis hic loquitur? **ERG.** Ego, qui tuo maerore maceror,
macesco, consenesco et tabesco miser;
ossa atque pellis sum miser a macritudine; 135

neque umquam quicquam me iuvat quod edo domi:
foris aliquantillum etiam quod gusto, id beat.

HEG. Ergasile, salve. **ERG.** Di te bene ament, Hegio.

HEG. Ne fle. **ERG.** Egone illum non fleam? egon non defleam
Talem adulescentem? **HEG.** Semper sensi, filio 140
meo te esse amicum, et illum intellexi tibi.

ERG. Tum denique homines nostra intellegimus bona,
quom quae in potestate habuimus, ea amisimus.
ego, postquam gnatus tuos potitust hostium,
expertus quanti fuerit nunc desidero. 145

HEG. Alienus cum eius incommodum tam aegre feras,